

1898

Sep Florin Huonder ei ugau da Rosa Macolin, omisdus **Tujetsch**.

GR 13-01-1989 nr. 2

1898

Il suttascret venda ina partida badugna frestga da diever el vitg **Sedrun** per in raschuneivel prezi.

Cumpraders dueien s'annunziar ton pli spert tier

Alfons Jagmet a **Sedrun**

NB. Fetschel aunc da saver, che jeu vendi la badugna per in raschuneivel pagament era a quels dus umens, ch'han selubiu da sepatrunar d'in ton badugna sin mes funs, ils 19 da november 1897, la quala els ston forsa pagar pli tard.

GR 20-01-1898 nr. 3

1898

Milsanavon porta quella gasetta (*Bündner Monatsblatt*) meinsila igl interessant artechel historic sulla **Val Tujetsch**, purtaus avon da signur professor Muoth 1896 alla Societad historic-antiquara a **Cuera**. Cun quella caschun fa igl autur attents, che quella vischnaunca, che dumbravi 1850 aunc 979 habitonts, vevi en consequenza dall'emigraziun tiella davosa dumbrada da 1888 mo 768.

GR 20-01-1898 nr. 3

1898

Venal: in vadi mascal giuven tier Giochen Deflorin a **Rueras**.

GR 20-01-1898 nr. 3

1898

Producziun teatrala a **Sedrun**

Gievgia grassa, ils 17 e dumengia ils 20 da fevrer vegn menau si:

Il fegl scumbigliau ni calger stai tier tiu laisch

Cumedia en treis acts. Denter ils acts musica. Avertura a l'ina e mesa suentermiezd.

Entrada: I. piazza 80 cts.

II. piazza 50 cts.

Affons la mesadad

Tier numerosa frequenza envida gentilmmein

La societad da musica **Sedrun**

GR 10-02-1898 nr. 6

1898

Ils dus minorents frars Stiafen e Gion Fidel Schmed han per ugau Hans Giachen Caduff, tuts da **Tschamut**.

GR 17-02-1898 nr. 7

1898

Annunzia da mort

A parents ed enconuschents purtein nus cheutras la tresta nova, ch'ei hagi plaschiu agl Altissim da clamar ord questa speranza tier ina megliera veta nossa preziada sora, quinada, onda e cusrina

Maria Augustina Caveng

Suenter ina liunga e per part dolorosa malsogna eis ella resignadamein morta ils 2 da quest en ina vegliadetgna da 27 onns e 10 meins, provedida cun tuts s. sacraments dils moribunds.

Nus recumandain l'olma dalla cara defuncta alla pia memoria da tuts parents ed enconuschents.

En num dalla parentella en malencurada:

Sedrun, ils 2 da mars 1898

Carli Caveng, frar

GR 03-03-1989 nr. 9

1898

Annunzia da mort

En profunda dolor notifichein nus a parnets ed enconuschents, ch'ei hagi plaschiu agl Altissim da clamar ella perpetnadad nossa cara mumma, tatta, sora e sira

M. Catrina Muggli

Nata Condrau

Suenter ina liunga malsogna e provedida cun tuttas consolaziuns da nossa sontga religiun eis ella spartida ils 25 da fevrer ell'aulta vegliadetgna da 85 onns.

Nus recumandein cheutras l'olma dalla preziada defuncta alla pia memoria da nos parents ed enconuschents.

La parentella en malencurada:

Rosa Muggli-Muggli, feglia

Barla Decurtins-Muggli, feglia

Mengia Wenzin-Condrau, sora

Hans Giachen Decurtins, schiender

er'en num dils auters parents.

Sedrun e Regensburg, 28 da fevrer 1898

GR 03-03-1989 nr. 9

1898

Annunzia

Per l'alp **Curnera a Tujetsch** vegn ei priu si per la stad genetschas per in arvè da 15 frs. ina e mutgs per 10 frs. in. Da s'adressar tier Emanuel Deragisch. Ligiacadischs a **Tujetsch**.

GR 10-03-1898 nr. 10

1898

Sill'exposiziun da taur a **Trun** ei stau catschau 40 tocs, dils quals sis ein veni premiai en I., 9 en II. ed 8 en III. classa ed appartenevan als suandonts proprietaris: ... II. classa: Gieriet Cristian,

Tujetsch, in stierl 60 frs, Caduff Hans Giachen, **Tujetsch** III. classa: ... Berther Gion Andriu,

Camischolas per mutgs 50 fr.

GR 14-04-1898 nr. 15

1898

Venal ina biala vacca giuvna, che fa il matg vadi, tier Giachen Antoni Wenzin a **Rueras**.

GR 14-04-1898 nr. 15

1898

La vischnaunca da **Tujetsch** enquera da prender si en sias alps da schetgs per la stad proxima enzacontas genetschas per il prezi da 15 frs. il tgau e pustretsch inclusiv. Ils tiers vegnan pri a mauns entuorn s.Gion, ils 24 da zercladur.

Tujetsch, ils 15 d'avrel 1898

La suprastonza

GR 21-04-1898 nr. 16

1898

Annunzia da mort

Cun profunda dolor notifichein nus a nos parents, amitgs ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara mumma

Onna Maria Ursula Berther

Nata Schmed

Ella ei spartida resigandamein ils 28 da quest en ina vegliadetgna da 77 onns, provedida cun tuttas consolaziuns da nossa sontga religiun.

Nus recumandein l'olma dalla cara defuncta alla pia memoria.

Sedrun, ils 28 d'avrel 1898

Ils combrigiai affons:

Thomas Josef Berther, plevon

Pader Baseli Berther, OSB

Maria Ursula Monn-Berther

Vigeli Giusep Berther-Deflorin

Maria Turtè Berther-Berther

La sepultura vegn fatga sonda allas 9.

GR 21-04-1898 nr 16

1898

In bien fidau cavagl, empau passaus vi, vegn tschercaus da prender si naven digl εμπrem zercladur entochen miez october. Da s'adressar tier la Cruna a **Sedrun (Tujetsch)**.

GR 28-04-1898 nr. 17

1898

Annunzia

Dr. med. Stiafen Berther da **Tujetsch** ei sedomiciliaus a **Mustér** e habitscha en casa da signur professor Carigiet.

Uras per audienza: Mintgadi dallas 7 – 8 avonmiezdi, dallas 12 – 1 suentermiezdi.
Las dumengias 12 ½ - 2 ½ suentermiezdi.

Mustér, ils 4 da matg 1898.

GR 05-05-1898 nr. 18

1898

Annunzia da mort

Cheutras notofichein nus a parents ed enconuschents, ch'ei hagi plaschiu agl Altissim da clamar ella perpetnadad nossa cara onda

Dunna Fausta Muggli

En ina vegliadetgna da 70 onns eis ella suenter liunga maldispostadad, duront la quala ella ha repetidamein retschert ils s. sacraments, nunspitgadamein spartida oz a **Rabius**.

Nus recumandein cheutras la preziada defuncta alla pia memoria da nos parents ed enconuschents.

Per la parentella en malencurada:

Rabius e Rueras, 11 da matg 1898

Cristian Muggli, nevs

Rosina Cagienard Muggli, niaza

Cristgina Muggli-Beer, niaza

Maria Cagienard, sutniaza

La sepultura ha liug venderdis, ils 13 da quest circa allas 9 a **Sedrun**.

GR 12-05-1898 nr. 19

1898

Las vischnauncas da **Tujetsch** e **Falera** han menau en l'assicuranza da biestga. Bene!

GR 02-06-1898 nr. 22

1898

La fiera da **Tujetsch**

vegn tenuta sonda proxima ils 4 da zercladur a **Sedrun**. Per tuts tiers menai tier, sto vegnir presentau bulletta.

La suprastonza

GR 02-06-1898 nr. 22

1898

La fiera da **Tujetsch** dils 4 da zercladur ha giu entuorn 80 armauls, mo buca marcadont, tonpli che

l'**Alpsu** ei aunc buca aviarta e ch'ils Uranès han muncau, ils quals devan pli baul gronda vivacità a quella fiera. Tonaton ei ei aunc vegniu marcadau empau denter ils purs per bials prezis.

GR 08-06-1898 nr. 23

1898

Finalmein ei l'**Alpsu** era vegnida aviarta per carr da vart uranèsa e ha il cuors postal entschiet a cursar culs 11 da quest. Era il **Lucmagn** ei aviarts.

GR 16-06-1898 nr. 24

1898

Avis

L'alp **Curnera** vegn cargada ils 28 da zercladur.

Tujetsch, ils 16 da zercladur 1898.

Emanuel Deragisch, ligiacudischs

GR 16-06-1898 nr. 24

1898

Tractandas guvernativas. Las statutas d'assicuranza da **Breil, Peist, Tujetsch, Castiel, Trun, Valzeina, Feldis** e **Schluen** vegnan approbadas.

GR 23-06-1898 nr. 25

1898

Encuretgi in buob da 12 – 14 onns per pertgirar in cavagl cun pulein sin pastira da casa tochen d'atun. D'entrar en survetsch ton pli gleiti. Ulteriur sclariment dat Gion Andriu Berther a **Camischolas**.

GR 23-06-1898 nr. 25

1898

In buob da 12 – 15 onns vegn ei encuretgi per in'alp da nuorsas. Da s'adressar tier Josef Maria Albin a **Tschamut**.

GR 21-07-1898 nr. 29

1898

Ella **Surselva** ei la zoppina plinavon rutta ora a **Tujetsch, Schlans, Castrisch** ed a **Surcasti** etc. Sco bien meid encunter la zoppina recamonda in inserat dil Tagblatt d'unscher las plagas cun „verdünnte Carbolsäure“ ni „carbolsaurer Kalk“ sco era da stiarner ellas stallas frina gep. Il principal mied ei, sco gia savens recumandau, da tener schuber.

GR 18-08-1898 nr. 33

1898

La sonda sera ha il caver da **Sedrun** notificau alla suprastanza da **Tujetsch**, ch'ei sesanfli entadem la **Val Strem**, in toc sut igl ault dil **Kreuzlipass** giu, sper il trutgi, il cadaver d'in um, il qual ei sin immediata expertisa seconstatau. Il medem temps ein era gia dus amitgs ed il quinau da quei disgraziu vegni sur tal pass per encurir fastitgs da quel, essend ch'el havess schon dapi 4- 5 dis puspei duu esser turnaus anavos a casa, haveva giu dau negin rapport e ch'ins saveva da sia projectada rutta. Era fuvan tuttas retschercas telegraficas stadas senza success. Il disgraziu fuv in cert Albert Müller da 36 onns, oriunds dil **Turgau** ed emploiau a **Turitg** sil biro da controlla dalla Nordostbahn. Sin sia bara, che sesanflava en posiziun durmenta, sper la senda, han ins anflau ses daners, proviant e siu diari tut en uorden. Tenor il davos fuv'el serendius gia la dumengia avon allas 4 dalla damaun naven d'**Amsteg** e fuv'arrivaus pér las 5 dalla sera tiella crusch dil **Kreuzlipass**, pia pér en 13 uras, ferton che quei viadi selai far en 5 – 6 uras. Entochen leu havevan cavers uranès mussau ad el la via. Da quell'ura naven cala siu diari si, schegie ch'ins ha anflau sia bara in toc sut igl ault dil pass giu. Ad **Amsteg** havevan ins advertiu igl um giuven da buc ir sul **Kreuzlipass** ni silmeins buca senza guid, buca perquei che quei pass fuss grevs ni malsegirs, schegie da vart uranèsa ensi empau strapaziu, mo plitost perquei, ch'il disgraziu Müller fuv da fetg fleivla

constituiziun ed havev' aunc combas mendusas. Ei fuva perquei fetg temerari d'in tal um da serender sur in cuolm e lu aunc persuls. Sco ils cavers uranès raquentan, stuevi Müller tier scadina pendenza empau pli ferma seruschnar sin tuts quater, che vegn era confirmau tras il visum repertum medicinal. Tenor quel ha ei plinavon seschau constatar negins particulars indecis dalla caschun dalla mort da Müller, aschia ch'igl ei ord tut dubi, che quel seigi da fleivlezia buca serebitschaus vinavon e hagi stuiu suttacumber al strapaz a mesa via. Era ei ei da supponer, che quei pupratsch hagi aunc stuiu survivor si en quels aults la stravaganta notg da neiv e dracca dils 8 sils 9, che havess purtau la mort al pli ferm um en tala situaziun. La bara ei vegnida transportada ils 16 da quest a **Turitg**. La comunicaziun dalla Neue Zürcher Zeitung, ch'il cadaver da Müller fuvi tut smuttaus ei faulsa, essend ch'el purtava neginas blessuras e fuva buca ruclus.

GR 18-08-1898 nr. 33

1898

Il davos Fegl Ufficial nr. 33 cuntegn in diember brevs da hipoteca ord ils protocols da **Mustér**, **Schlans**, **Sumvitg** e **Tujetsch**, ch'ei tier la respectiva revisiun dils protocols da hipoteca dil cumin dalla **Cadi** buca stadas dadas en, ni dallas qualas ins ha schiglioc buca saviu eruir il proprietari. S'annunzian ils crediturs hipotecarics da talas brevs buca tier ils protocollists enteifer dus meins, sche vegnan quellas brevs annulladas. Cheutras ei lu la revisiun da quels schi impurtonts documents publics finida e vegn dacheudenvi speranza manteniu bien uorden, cun far cassar dafertontier brevs pagadas giu ...

GR 25-08-1898 nr. 34

1898

La superexpertisa per la taxaziun dils uauls ei finida e seresultescha ei tenor detagliau rapport dil respectiv expert, ferster Meier, ina sbassada totala per 2'623'106 frs. digl anteriur schazetg da 1896. Per **Tujetsch**: schazetg 1896: 171'400 frs.; revisiun 1898: 125'000 frs.

GR29-09-1898 nr. 39

1898

Damai che la zoppina ei ussa silmeins ellas cuntradas nua che'ella ei rutta ora gl'emprem, sco per exempel ella **Cadi**, varghentada e ch'era il contumaz e las desinfecziuns dils nuegls ein cheu ualti alla fin, speran ins senz'auter, che nossas autoritads vegan immediat a far tut lur pusseivel per far arver ils pass al commers da biestga ...

GR 06-10.1898 nr 40

1898

Il cuors local sull'**Alpsu**, ch'ei dapi entgins onns tras intermediaziun da nossa direcziun postala vegnius concedius duront l'emprema mesadad dil zercladur e la secunda mesadad da settember cun taxas d'unviern, ha era uonn giu fetg gronda frequenza, in mussament, ch'el fuvi in basegns, ferton che l'allegada posta nocturna purtava mo mintgazacu in dormulent passagier. Ins spera perquei ina midada da quei cuors!

GR 06-10-1898 nr. 40

1898

Las suprastonzas dallas sis vischnaucas dalla **Cadi**, ch'ei libras dalla zoppina, han sin iniziativa d'ina libra radunonza a **Mustér**, petiziunau telegraficamein tier la regenza, ch'ei vegni immediat aviert silmeins il commers da biestga sur il **Lucmagn** e l'**Alpsu**, ch'ei vegni schau tener las fieras regulars e las exposiziuns e ch'ei vegni publicau quei commensuradamein. Per part ha la regenza, sco ins vesa ord al hodierna respectiva publicaziun, corrispundiu a quei giavisch.

GR 13-10-1898 nr. 41

1898

Signur Stiafen Berther da **Camischolas**, che ha dacuort fatg igl examen da miedi sill'universidad da **Turitg**, ha quels dis era obteniu leu il doctorat dalla medischina. Gratulein!

GR 13-10-1898 nr. 41

1898

Ils frars Kellenberger han quels dis viagiou la **Cadi** e cumprau a **Medel** 46 genetschas ni vaccas per 13 – 21 marenghin l'ina. Per mediocras genetschas han els pagau intagliauter 16 e 17 marenghins. Cun **Tujetsch**, che ha megliers tiers ed ha tenu la dira, han els saviu marcadar nuot, era pauc a **Mustér**. Denton ein ils sura prezis tenor rauba aunc adina andants. La mesjamna ha era il marcadont Fellmann digl **Aarau** catschau giuviars 25 vaccas ord **Tujetsch**, tut rauba da bienmarcau. Ils stiarls paghien uonn 1 – 2 marenghins pli pauc ch'onn.

GR 20-10-1898 nr. 42

1898

Annunzia e recumondaziun

Il suttascrèt fa cheutras da saver ad in ludeivel publicum, ch'el hagi en bien stan sias maschinas da scarsinar launa e scarsini per 15 cts. il fund. El ha in depot a **Mustér-Raveras** tier soras Fontana e vegn inaga per jamna leu per la launa. Empermettend buna e sperta lavur serecamonda

Anton Gisler a **Sedrun**

GR 20-10-1898 nr. 42

1898

Tiers jasters

Tier stalter Thomas Schmed da **Cavorgia** sesanflan sequentas nuorsas vanzadas tiella zavrada da **Tujetsch**: 1. In tgisch ner, dretga giudasum, in dentresgia ed in snez davos en entraviers, seniastra giudasum. 2. In tschanc alv, dretga scurselau davon ora, ina ruosna e dus snezs davon en. 3. In tschanc ner cun corns, dretga in snez davos en, seniastra giudasum. 4. In tschanc alv cun corns, dretga ina furcletta orasum l'ureglia, in gavigliel davon ed in snez entraviers davos en. 5. In anugl ner cun corns, dretga ina furcletta orasum l'ureglia, seniastra dus snezs davos en.

GR 20-10-1898 nr. 42

1898

A **Rueras** tier Lezi Antoni Brugger in grond e bi engarschaun, ina liufa schubergiada da dus onns.

GR 20-10-1898 nr. 42

1898

Tiers jasters

A **Cavorgia-Tujetsch** tier stalter Thomas Schmed sesanfla in anugl grisch cun corns, ureglia dretga ina furcletta orasum ed in snez davon en, seniastra ina furcletta orasum e dus snezs davos en.

GR 27-10-1898 nr. 43

1898

Dr. med. Stephan Berther a **Mustér** ei per quest unviern absents. Tuts davers vegn ei supplicau da pagar a signur genau Gion Andriu Berther a **Camischolas, Tujetsch**.

GR 17-11-1898 nr. 46

1898

In vadi ed ina vadiala tier Gion Fidel Berther a **Rueras**.

GR 24-11-1898 nr. 47

1898

Tiers jasters

A **Sedrun** tier Rest Flurin Monn duas ansolas culla medema nota: dretga tagliu giudasum e fess, seniastra pala. A **Sedrun** tier Giachen Antoni Soliva in'ansola buca nudada.

GR 07-12-1898 nr. 49

1898

Dus marcadonts bavarès han cumprau si in triep bunas vaccas e genetschas en **Tujetsch** e pagau
19 – 26 marenghins l'ina.

GR 15-12-1898 nr. 50